

UVODNA RIJEČ PROF. DR. IBRAHIMA KARABEGOVIĆA, DIREKTORA INSTITUTA, UOČI POČETKA RADA NAUČNOG SKUPA

Naučni skup pod naslovom *Historiografija o Bosni i Hercegovini* organizovali su zajednički Institut za istoriju u Sarajevu i Hrvatski institut za povijest u Zagrebu. Ja se ovom prilikom najljepše zahvaljujem gospodinu, kolegi i prijatelju dr. Mirku Valentiću, ravnatelju Hrvatskog instituta za povijest, koji je, ja bih rekao objeručke i bez ikakvih uslova, prihvatio ponuđenu saradnju. Nadam se da će se i našem Institutu ukazati prilika za revanš.

Današnji naučni skup koji je, ustvari, nastavak sličnog naučnog skupa održanog u ovoj istoj sali februara 1982. godine, pored ostalog ima zadatak da izvrši uvid u ono što je u oblasti historiografije napisano i objavljeno o Bosni i Hercegovini. Naravno, očekujemo da će se neki referenti upustiti i u ocjene objavljene literature, da će ukazati na stepen obrađenosti određene problematike i na neki način trasirati put daljim naučnim istraživanjima. Poseban značaj pridajemo činjenici da smo uspjeli da okupimo dosta historičara iz susjednih zemalja, pa čak i iz SAD, i nadamo se da će njihovo prisustvo doprinijeti obnavljanju i učvršćenju ranijih i uspostavljanju novih veza i saradnje među historičarima. Naravno, u ovom trenutku u kojem se nalazi Bosna i Hercegovina teško bi bilo zamisliti da se organizuje ovakav naučni skup bez materijalne podrške sponzora: fonda Otvoreno društvo Bosne i Hercegovine (SOROS fondacija), Sarajevskog kantona - odnosno Ministarstva za obrazovanje, nauku i informisanje, kao i kolega sa Sent Lorens univerziteta u Njujorku i Univerziteta u Mičigenu.

U ime organizatora najljepše se zahvaljujem navedenim sponzorima.